

摘藻堂四庫全書薈要

集部

欽定四庫全書叢要

集部

皇清文頴卷四十三



詳校官候選知縣臣吳南華

欽定四庫全書薈要卷一萬九千四百四十四

集部

皇清文頴卷四十三

賦

夏雲賦

張廷瓚

青陽既饒絺衣漸成徵音協律火德司衡繼長增高啟

明堂而布令含桃嘗麥薦清廟以將誠陰陽所結雲氣
初呈炳陸離之異色任卷舒於太清既從龍以徐作亦
觸石而旋生風動影移點綴鳳鸞之彩山蒸川潤飄揚

珠玉之精助函關之紫氣闢霞標於赤城示文章之奇
麗比巖岫之崢嶸若乃萬象熙熙一陽杲杲丹心傾乎
素葵晴暉照乎碧草始焉迴抱映皎日以增華漸覺紛
綸亘長空而布藻衆峯之斷續相參孤嶠之稜嶒欲倒
入密林而如織紛出岫以高舉若澹若濃雨絲隨之而
飛灑乍離乍合雷聲乘是以迴旋散輕陰於大地沛汪
濊於高天覆平疇而增綠冒遠樹而生烟迨乎天光欲
霽簷溜旋乾夕陽微照晝漏將殘蘋末之風拂輕衫而

漸起冰輪之月掛碧落而初團望橫空之漠漠忽片影
之漫漫輕如染黛白若飄紈傍踈星而繚繞依銀漢而
盤桓數朶參差莫辨羣山之何屬浮空變幻乃知造化
之無端爾其為狀也輪困氤氲天章纂組散兮若升歛
兮若俯緩兮若錦幄之方張疾兮若翬翼之輕舉浮沉
兮若滄溟之驚濤攢簇兮若天朝之繡黼恍天孫之夜
織兮濯七襄之錦於明河儼海若之春遊兮吹蜃氣之
樓於孤嶼况復聚散徐徐徘徊自如雖垂天之足覽豈

定在之能拘本無心之變化不留滓于清虛夏非雲則
炎蒸曷潤雲非夏則瑰麗安舒順自然之時序乃盡態
而無餘是以黃帝紀官師之名穆滿有瑤池之賦護汾
陰之寶鼎綴栢梁之甘露擁王母之坐則香散樓臺望
沛公之營則氣成龍虎凡史策之所載固更僕而難數
恭逢泰運

帝德承乾兩儀定位七政相宣解慍阜財薄海洽南薰
之奏光華復旦羣臣賜紉縵之篇值土氣之方潤正離

火之欲燃騰清輝之靈黠浮積氣之蜿蜒秀色連卷驅
虹霓而直上奇姿惝恍應箕畢以開先瞻榮光之干呂
與景星而並懸豈不足以發乾象之煒耀而侔

睿藻之聯翩哉

喜雨賦

有序

張廷瓚

臣聞國家根本在農必藉雨膏之澤帝王稼穡為
寶時深水旱之憂蓋統天下于一身視民間若外
府為農請命自天降康隨感能通如響斯答我
皇上道握乾符恩流豐蔀捐珠抵璧維勤儉耜于西疇
賜粟蠲租屢出朱提于左藏時當春日念切田功
東作方興甘霖宜霈

特遣天潢之胄致祠西嶽之神齋祓精誠輒減官庖供

億儀文簡質無勞驛騎馳驅豈同望祀之恒規實
屬明禋之曠典更頌

丹詔分命禮官各勵精心肅將祀事務使誠在幽而必
格勿謂天為遠而難知果爾

至德潛孚重蒼協應旋召離星之月忽移貫斗之雲樹
色烟籠遠望西山飛瀑柳絲風織平添太液新波
雖降澤于紫霄實流膏于

清禁蓋山靈河伯皆奉

天子之威靈而甘雨和風咸本

聖心之仁愛臣幸居史職敬誌

天庥謹作賦曰

節迎首夏時屆朱明祝融秉歷赤帝司晨炎曛自始火
德方新攬溝塍之繡錯布原隰之龍鱗青苗吐秀嘉穎
垂芬需茲甘澍黍稷生春田父瞻雲于桑隴
一人旰食于楓宸于是發

德音下

明詔陋巫史之紛紜殫精誠而感召遣

帝室之親賢肅華陰之昭告務期揮霖雨于仙掌之峰
洒甘露于蓮花之嶠更

命宗伯秩太常修雩祀考彝章蠲慮靜志叩于天閭扇
微風兮瀰陰壑翳輕雲兮韜陽光乃

宸衷之甫動已上達于穹蒼是日也天光亭午日影乍
收氣滃靄而如暮聲颯灑而兼秋雷闐闐而鼓急雨霖
霖而絲稠濺珠光於綺綴掛玉屑于龍樓已足掃紅塵

而清六合滋黃茂而卜有秋矣越翼日之晨澗隱晴霓
林鳴陰鳥始攢團于天際終縈洄于林表其緣鴛瓦而
注也若匹練之高懸其浮碧落而來也若銀河之欲倒
紅沾

上苑之花翠濕

玉階之草香糝寶鼎之烟波溢昆明之沼

天子乃坐廣廈啓珠扉歌有渰之萋萋咏興雨之祁祁
聽銅龍之響急望金掌之雲飛忘

玉衣之沾濕樂民願之無違若乃觀彼禹疆眺茲堯宇
空濛遠岫周流平楚含爽氣而迎涼迴炎曦而却暑吐
歎薄于珠泉散紛披于冰縷走急潦于橫塘匯奔流于
洲渚羣致慶于神庥共騰歡于華黍是以土膏資其霖
霖嘉禾蔚其繁昌迎金風而薦秀浥玉露而含芳垂穎
歌夫比櫛落實積夫倉箱結綠懸黎充牣乎里閭隋侯
明月錯落于綺疆夫孰非

聖天子無逸以崇稼穡一德以薦馨香而致此哉都邑

父老荷鋤饋饁之儔沐膏澤而咏太平者為之歌曰
聖人在宇兮臨萬方恭默潛孚兮格九光走神龍兮舞
商羊驅雲車兮灑天漿同莖異穗兮迎青霜蒞珠金粟
兮盈秋場盤中粒粒兮

君恩長耕田鑿井兮無相忘飲且樂兮壽而康於萬斯
年兮戴

帝德之無疆

玉河新柳賦

曹鑑倫

爾其標瑞莢於彤墀植華平於瑤圃比漢世而芝發齋
房對堯天而松生棟戶君遷古度蘭成之所臚陳玉樹
青蔥馬卿之所纂組榆垂天上之光桂長月中之樹靈
鳳之所棲遲祥鳥於焉翔舞縱摘藻以摹華非見聞之
所能譜若乃九門日朗萬雉雲輝玉河如帶碧水生霏
何以拂靈雨弄晴輝罨紅樓而婀娜臨紫陌而芳菲於
是殷璠始栽朱陽乍滿穉態迎風柔條颺暖惟日月照

臨之地在鵲鸞披拂之中分瓊島之韶華重城不隔借
液波之沾潤流水時通拂面依依便疑張緒逢人濯濯
旋類王恭葉葉輕黃染檀痕而新畫枝枝淺綠蘸黛影
以初融則有貂蟬小隊來繫花驄誇命中於百步貫楊
葉於雕弓亦有詞客停車流觴迢遞歌上巳之風光贈
柳圈而修禊乃其金絲旖旎翠帶翩翹仿賦筆於華林
春旗一色繪風流於漢苑弱體三眠或朝回而走馬或
公退而垂鞭出春明而掩映過宣武而使娟柳宿重光

照城南之尺五柳枝一白陋東府之三千豈與夫亞夫
營裏京兆街前金城路側灞水橋邊但攀條以寄興託
風物而流連想江南之萬樹爭宵水而飛綿何限藏鶯
之縷徒牽載酒之船望雲霄之列植羨雨露於九天長
樂之鐘聲不盡麗譙之漏點遥傳銷春光兮歲歲被化
日兮年年

春省賦

沈朝初

若夫三農百穀七陌九阡式觀食貨緊實民天望杏瞻
蒲之候祁寒暑雨之占于耜舉趾菑畝新田蔗蓂勤於
力作與翼頌于豐年聖王所以戒農官而勤民事巡郊
遂而惜春暄枉千乘於隴首示萬國以帥先者也爾迺
北斗朝天東風拂地太皞司辰勾芒定位曦輪乍暖陽
隨彭澤之禽淑景初舒谷滿析溫之氣池開青荇之波
花染黃鶯之翅絳雲作片杏一笑以烘霞碧玉為條柳

三眠而曳翠芳林蒸日燦燦英華香草綠隄氍毹委被
值上苑之青蔥正耕耘之始事當夫田畯至喜家室相
歡揮鉷去莠築堰澆蘭饁餉紛于士女畚鍤荷于林巒
葵腰鎌而乍采秧策杖而時看風笠糾舉烟蓑滅漫引
甘泉于遠澮浮翠梢于清湍願歲時之無易思種植之
維艱於時

天子勤民事重農疇務稽勸耕顧勞心於稷契授時度
地彌急務于殷周循先農之貽桀恢駿發之遠猶駕金

根於玉軫策驪駟於蒼虬啟鳳扉於鸞閣開雉扇於龍
樓千官星列萬騎雲稠歷東郊之駘蕩經南郭之廣袤
隄畔王孫之草花前珠勒之騶染輪蹄於瑞靄和鈴響
於鳴鳩遵紫陌而乍轉度青門而歷遊卷芳塵於林薄
動神光於旌旒遂攸介而周咨蒸髦而慰語考俗觀風
量時較雨視畦徑之如繩覩新苗之若縷既深溉而疾
耕爰濕耒而燥黍微颺漾於青蘋輕靄留於赤杜駢肩
隴上之鉞聯袂桑間之筥白叟含哺黃童翔舞然而

聖心軫念天懷噢煦一夫未澤九迴靡已慮部屋之無
資倘窮簷之失所倉庚拂而淒其布穀鳴而延佇徒歆
澮之星羅何手足之胼胝既東作之艱辛奚西成之億
秭散財發粟家盈戶滿非櫟陽而雨金似陳留之下黍
襁褓用勤桔槔斯舉東塍西陌簇保介而咨茹上隴下
畦悉曾孫之秬秠從此無荒畛而遺隰無珠粟而桂薪
甸原野而思夏德覩頴粟而念周仁暫奉宸軒冀春王
之再至小留仙蹕寬寸晷之行巡遂使比舍駢鄺荷耰

鋤而載忤九州六宇合主伯以克勤非

聖主之重農賜恤何恩膏之髓浹肌淪是以騶虞麟趾
之獸羣遊苑山雙岐百穗之禾挺生畎壑芝房輪囷而
玉英景雲璀璨而金萼祥麟遊乎湍瀨丹鳥吟於觀閣
覽庶績其洪凝嗣賡歌之浩作

櫻桃賦

有序

楊大鶴

時維朱夏百果含榮而櫻桃獨以先時而熟稱為
嘉植故古者往往樹於芳林薦之寢廟其見珍也
宜矣竊效昔賢體物之意裁為小賦以寫其致其
辭曰

緬時物之應候有朱實之離離方辭春而吐秀乃迎夏
以標奇陋成陰之桃李效傾陽之露葵圓瑛綴顆密葉
成帷非徒植于西京之園即移根於含章之殿乍抽條

以似藍俄凝實而若茜銜來御苑之鶯棲共上林之燕
自大官之採擷供寢園之春薦染懸黎以垂樹琢珊瑚
以成丸盛有金絲之籠供惟赤瑛之盤映日而繁星不
散研朱而清露猶團迺其圓勻質美酸甜味足比若木
則多滴歷之珠擬紅蓮詎遜玲瓏之玉信飽食其不妨
有蔗漿之可欲夫物以應候為榮非時則失冬何取乎
枇杷夏何思乎盧橘沉碧李而情怡浮翠瓜而美溢彼
朱柰與安榴各逢時而不一况當清和而曜采先百穀

而揚英就丹宮而早熟出筠籠而見擎若茲櫻之爛熳
固奇葩之挺生既羅羞於王公亦待聘於席珍惟嘗新
之足貴洵夏淺之勝春顧樗櫟之陋質徒負愧於良辰
撫嘉果而體物敢繼響於昔人

玉河新柳賦

李字青

皇都春早紫甸寒輕

苑花穿蝶

宮樹流鶯披玉河之新柳裊弱質以盈盈夫其芽點嫩
黃稊抽淺綠好風之管領無邊皓露之沾濡才足紅墻
東側匝匝一灣碧沼西頭迷離幾曲曉烟捲去分明春
水微波夜月含來亦似秋天初沐纖穠骨格忍被亞夫
營裏之名婉潤丰標不作何妥巷邊之族踈地金縷彌

空麴塵歇小侯之寶馬蔭華胄之雕輪搖颺

龍池十里之亭臺隱隱依微

鳳闕千門之簷瓦鱗鱗江北江南梁苑之花似雪三眠
三起漢宮之樹名人原夫如線如絲宜晴宜雨等腰最
削賞眉偏嫵攢青兩岸中淹蘭葉之舟濃黛一堆旁罨
桃花之塢評量才質雲堦月地之品流檢校風情騷客
詞壇之宗主既種性之殊恒宜結根之得所乃有漢南
拋擲灞上攀牽關山何處洛中可憐溧陽酒樓無端三

月武昌堠館重來幾年此則短葉披塵淒心麗殺長條
拂路摧意纏綿者矣至若中散門前柴桑宅裏桐分陰
以滿齋槐夾植而成市柳刺史桂林江上幾歲栽培杜
拾遺秦州道中連朝徙倚金城搖落擁腫十圍板渚棲
遲綿延千里雖邀顧盼之歡未極遭逢之美別有上林
池館樂游綺羅坊名永豐殿號靈和毬場畫蹻舞榭晨
搓帶蟬正好翻燕如何映酒敬枝全身似舞隔簾吹絮
逸韻疑歌然而京兆街心章臺樓角縱極目以延緣究

殊情於今昨睹此日之芳菲

御溝而綽約先

禁籞之朱櫻壓堦墀之紅藥停寸晷以徘徊記千株之
約畧

神州沃壤

帝里醲膏甘泉浹潤太液分饒綴景瀛洲肯藏鴉於密
葉飛華露掌寧繫馬於柔條一桁西山嵐翠淋侵乎

御陌八星南曜光芒騰射乎魁杓歸院曾迷插門亦可

子城陰處零殘雪以猶霏東面風過擺長衢而倍譚王
恭濯濯對月爭妍張緒依依臨風獨坐一夜綠絛新剪
能忘疇昔之染衫五更寶炬如城却憶清明之賜火

--	--	--	--	--	--	--	--

南郊瑞雪賦

有序

王沛思

蓋聞萬物本天運化機於北極一陽動地肅祀典
於南郊風飄黍稷之馨爐烟馥馥氣散雲和之響
竹管鏘鏘祀日至以迎初陽隆鼎烹而享

上帝掃壇為祭昭事在潔籩肅豆之中積敬以將凝休
於薦幣陳牲之外心和則神錫之福德盛而天且不違以故明禋上升雲興霧起因而霏微下逮物
潤土滋瑞協三冬被野而千林輝映花飛六瓣彌

川而萬頃玲瓏隴麥資生搃沾濡乎禹甸農民誌
慶爭忭舞於堯衢仰元化之紛綸識太和之感名
非能占驗時逢量日之初幸在趨蹌義竊書雲之
比爰濡筆而賦曰

維黃鍾之應律睹景色之呈祥授時而土圭測影占候
則宮線添長於卦觀其來復於氣驗其生陽水泉動於
子月天心見於微茫王者所以配天而崇郊社報本而
肅享將也我

皇於是修祀事迎陽日或列黃琮或陳蒼璧或用陶匏
或肆繭栗彝尊寶鼎肅肅薦馨玉戚朱干雍雍舞佾匪
云邀福有感必通用以告虔亦文而質於斯時也柴方
燔而氣欲成霧齋既致而誠可動天同雲脩布瑞靄爭
妍初猶微霰之乍集既乃密雪之回旋隨風則忽飛忽
舞落英則若絮若綿迷離乎壇丘之上淅瀝乎

輦路之前乃霑濡既紛氣象愈淨喻其朗潔色與玉鬯
爭明擬其飛揚氣與葭灰相應樹葉重而栢枝盡垂積

輝凝而燎烟不勝已而地將盈尺花飛蔽空映陪祀之
千官皎如鷺序照饗壇之萬瓦燦若瑤宮片片晶鹽疑
造物為之調劑霏霏玉屑似化工為之磨礱惟

聖天子之積誠對越肅志升中斯能應時和以承靈貺
召嘉瑞而利農功猗與盛哉盖雪之為義也陰氣上蒸
陽氣下濺融於夏則為雨為霖結於冬則為冰為霰數
成地六故花六出而翻飛水生天一故本一元以貫串
於以順時解滯利物厚生舒兩間之鬱結鼓庶彙之勾

萌潤枯泉而不竭消旱蝗於無形縱使雨玉遍乎郊原
雨珠盈於丘壑號寒不可以衣被啼飢不可以咀嚼孰
若此之膏澤旁流天人交格為豐歲之先資而欣陽春
之有脚也哉乃作歌曰

帝德精誠兮感穹蒼濂濂浹浹兮瑞雪颺遠阡邇陌兮
麥苗昌預占大有兮慶穰穰民氣胥樂兮

聖澤長



荔枝賦

余志貞

伊圓穹之瑞精煥星景與雲卿濡瀨氣於草木遇品物
以流形隨墳壤之攸產挺嘉卉之蔥菁鍾嶺南之奧區
蔚荔枝之叢生長羸節屆鶉火星移浮瓜沉李暑雨涼
颼緣岸圃兮寓目結朱實之離離爾乃團團布密狀如
車蓋幕澗蔽虧轆轤掩藹緗英黛葉同虬松之不凋紺
理紫文入閨苑而曜彩綴之瓊幹纍纍明月之珠薦之
琯盤灼灼玳筵之貝况復實駢火雲味酌天漿潤侔和

壁奇踰五黃遠而望之粲若繁星麗碧落迫而玩之皎
若朝霞映太陽雖有側生之謂終無忝上國之光至如
珍族博傳淑類不一陳紫宋香方紅江碧鳳爪龍牙變
態百出承甘液之零露凝如水精飲豐潤於醴泉融如
絳雪香肌膩肉髣乎姑射之姿寒玉冰紈穆矣琅玕之
色則有侯家甲第梓澤芳園穿池曲岸蓄水河源千株
畢植萬顆俱圓火齊照耀滴乳凝鮮解煩已相如之渴
辟穀得留侯之仙又有期門公子澤宮弱冠修景納涼

乘間縱翫稅龍馬於金隄命鳧舟於江畔憐樹端之陸
離愛懸黎之璀璨更有東都幽人西園嘉客珍果新嘗
清香欲絕紅綃玉膚寫入海上之詩絳囊晶丸載在風
騷之籍美矣哉向使獨秀上清之境不落人間之世同
蟠桃之結實與鵜鵜而並至足使蓬島增輝塵寰延佇
豈非超衆果而獨貴婉羣彙而尤麗者乎歌曰迤邐海
嶠荔子丹兮萋萋馥馥烟霧翻兮外朗內潔匹明璫兮
芳心甘氣沆瀣寒兮欲繪名品媿陸潘兮

賜宴瀛臺賦

倪燦

辛酉孟秋

皇上駐蹕瀛臺讌賚羣臣昭異數也於時江海不波山澤並晏泰階既平昭華爰獻天瑞降而銀甕呈地符升而器車薦調五緯於靈臺靖八維於赤縣飛聲騰實禮傳布政之宮直暢旁施樂奏總章之觀吹鱗沒羽之族稽首來王赤蛇青馬之區望風請吏豈止狎素游蘋團膏漱醴半景青赤孳厯虧盈而已哉於是

天子乃陬吉日命良時啓西苑俯瑤池張廣筵受天禧
羣工百職濟濟師師聽金鑰而戒旦警銀漢而趨墀於
斯時也玉露方降少皞司秋眺嘉林之綠蔚睇菡萏之
紅浮後先繼至拜舞攸同爵引躬桓之五等班隨劍履
之三公碧磴紅泉識蒼龍之過雨螭頭雉尾見朱雀之
凌風其為殿也層臺妙迹仙署宸居學茅茨之不翦直
清禁之宵餘寫冲襟於月峽昭太素於烟墟撫檐楹而
論道對水鏡而披書既而旁觀遠嶠斜瞻黛壑複道烟

迴攢溪霧錯疊輦路於盤龍響奔濤於控鶴萍徙楚江
之蒂花轉崑墟之萼蘭飄君子之香松比大夫之爵柳
墜露而魚驚浦含珠而鳥落前臨太液彌望廣淵灌注
靈沼發源玉泉橐羣流之浩淼凌萬頃之波瀾龍口仰
而噴沫虹梁亘以造天瞰金鰲之髻鬣羨玉螭之嬋娟
紫茵前媚朱柯耀鮮渚浮杜若堤被香荃更有承光秘
殿瑤華別島古柏挺幹而蜿蜒廣寒散彩以窈窕峯深
夜久潭靜秋新荷抽水葢薜引山茵雪芝獻液紫卉傾

津乍棲神於窅渺恍游目於太清其旁則有叢竹之亭
藏舟之浦鸞鶴之羣龍鳳之舸蓬壺再覲於寥瀛溟渤
若移於庭戶長風激而奔雷飛瀑下而成雨若夫崇智
臨猗政和樂成亭臺交錯殿閣縱橫樹奇抱石枝新吐
茸鵷鵠鴻鵠叢集乎其中至於香分太乙之壇圃種優
曇之樹掌擢雙立之金莖盤結三危之瓊露遇松喬於
廣軒揖羨門於天路屑玉英以長存豈膏梁之足慕時
而葆翟交垂羽旗斜指水嬉泛其沙棠銀塘迴其蘭艤

揚帆北渚放纜南涯鳬驚鷗動雲起雪飛湘娥聞而隱
現河伯見而躑躅何輕舟之往返猶寸晷之未移然後
釣魴鯉攫鰕鱗拾紫貝取文魚網開荇藻鏡映琉璃庶
石華之可掇似海月之堪携斯誠闕庭之勝概而宇內
之奧區也於是雲罕載臨羽林清曠風傳警蹕日輝天
仗乃有簪筆從官文昌上相詞賦則東馬嚴徐勲業則
臯夔尹望畫省之儔惟兩尚書之班獨上簪裾奕奕頌
鶴鷺之具瞻劍佩鏘鏘傍瑤階而相向位次既齊大賚

爰沃出內府之奇珍頌天家之霧縠懸機功縹雲不去
而恒飛變緝新絲藥雖寒而不落於是太師合奏司正
論功雲開甲帳苑繞璇宮豹胎割翠虬脯燔紅煮丹穴
之雛鳳膳越嶺之珍熊梨稱縹蒂李字黃中揮虞絃於
九陛醉堯酒以千鍾咸感

恩於湛露願揚藻於雄風我

皇上安不忘危樂猶致戒既耀德以觀兵復同箴乎交
泰洵太平之盛事揚休聲於千載爰作頌曰

穆穆我

后萬齡作聖武定元基文清寶命波恬四海明宣七政
息衆以寧綏荒以令

飛龍繼迹鳴鳳重光乂安寰夏迭用柔剛戈船泛月劍
騎橫霜風驅海石電掃黔陽我

后崇儉深戒侈靡力役罕用疾苦是咨

朝堂肅穆簪紱委蛇勤政豐豫廣覽遐披禁籞西偏

內廷右掖複道紆迴長林蓊鬱平楚流青遠峰聳碧遊

晏神臯仙靈室宅乃踵舊制乃創新模乃疏幽壑乃引清渠

瀛臺既啓穹表雲衢匪崇彫飾取法唐虞

賜宴羣臣長筵是撫玉觴分賜周規折矩不借鳴琴無勞會舞上和下悅情怡神聚我

后之德備致嘉祥八風從律朱草豐唐

惠流蔀屋澤暨遐方微臣作頌螽測難量

賜宴瀛臺賦

有序

陸 綦

皇上勵政之二十年文德誕敷武功遐暢一日二日萬
幾不自暇逸百爾臣工罔敢弗欽承我

后之意以靖共乃位猗歟曷哉明良喜起參唐虞而鼎
盛矣當夫徂暑之月駐

蹕乎西苑層臺凌霄綠波縈之望若員嶠然非以樂遊
觀安逸豫也蓋極尊親之孝養以祗奉

璇宮問寢視膳既朝夕靡間而且侍

鳳輦於琪林泛龍輜於蓬沼薰風生涼甘雨灑澤天人
懽協禎符衍祥乃復昧爽而興進三公九卿百職
事於雲牖之下考政治之得失辨論人材而進退
之不啻延英之召對也

聖慮所周俯念臣庶顧茲臺沼將與羣工偕樂其有爰
居肇秋吉日惟申

召宰相以下暨六曹員外郎以上入瀛臺而燕饗之先
布

綸音錫以表裏既飽之餘

申命醉止莫不感悅舞蹈彈量畢懽肅肅雍雍成禮而
退誠泰交之氣象亘古所未有也臣不職以史館
微員忝預班末杯杓不勝如蠡測海欣忭之下謹
拜手稽首而獻賦曰

粵惟

帝清之誕膺景命也維玉繩而建極廓析木以立京法
太微而臨座象輦道以經營統乾德之廣大奠八埏以

永貞於時三階昌明重床累洽體天時而出政順物情
以作哲諧簫韶之九成解六服之炎暘蒞庶事以率興
御講幄而不輟乃瞻赫曦麗天中揮五琴歌南風

天子於是乘夏令應林鐘思以居高明而定心氣處臺
榭而合昭融則惟西華之近苑為紫垣之右輔實密邇
於

宸居作坤維之禁籞中有昆明濯龍之池太液唐中之
渚綺散霞夕鏡瑩星曙晴泓一碧颺蕩鱗聚纖霖漂縈

驟澍籠霧浩浩泱泱澌泅灌注爾其綠楊漲煙斷岸若
連菡萏約秀芙蓉逞妍紅白相屬金碧相宣低光夜舒
分枝合歡之美繡錯乎其間下有厥櫟稜峭雞翔蝦股
蜎苞雁頭累累珠裏伊涼燠之性殊聿參差而結緒鳧
茨藉姑鵠瀉劍蒲葭蘆交叢以蓊薈菰蔣轆轤而紛披
荇牽弁帶藻漾雞蘇屬玉連拳而雪映升菰唼露而茵
鋪象扶桑與濛汜列瀛洲與蓬壺其上則崇樓飛閣金
鳳銅爵丹雘虹垂果悤珠絡花萼之氣常通太華之峯

如削洵藥宮之莫睹恍乎窺絳霄而仰碧落茲乃於

臨御之偶暇奏對之既休相月孟奭大火西流言集羣
臣來豫來遊列鷁行於苑路秩雁序以登舟乘仙槎而
汎銀漢附彩鷁而問牽牛榜師鼓楫銜尾南浮溯流沫
之響牕泊凝碧之芳洲遂升橋亭仰象闕聆

皇言之藹如儼

天威於咫尺出含章之繒綵頒未央之通帛示章采之
有差均多寡以沾澤於是扶疏覆帟張幕承雲魚魴燕

尾妙香氤氲肆筵設席穆然以欣籩人實籩醢人實豆

分玉粒於堯厨登珍膳以維偶膾炙美而處外穀載列

於左右鑒簠簋之必飭矧異數以命宥歌飽德以樂胥

普受福之孔厚既陳饋以倍八復烹鮮而薦副沐在藻

之恩膏啍一割其何陋爰撤餘俎罷初筵蔭倚萬年之

樹側聽靈芝之泉望水亭之太素想茅茨之在前並鼓

腹於天衢而軒舞之翩躚於斯時也日之方中清颺初

起鳴蟬嘒嘒聲曳層翳爰旅穀核爰錫酒醴則有綏山

絢紅融峯結紫纂纂揆栗赤心黃理馬乳移種於西涼
驪珠貢珍於越篚羅嘉果以維馨紛黃帕之斯啟跪受
金爵琥珀其光繼以縹瓷再覆再揚內卿宣勸洗爵飛
觴不醉勿歸湛露洋洋疇不春融眼纈赭渥顏酡玉山
峙而弗頽雲冠切而不俄雖燕衍之式忭矢溫恭而靡
他曰既醉止油然旅退薄晚靄於林暉凝秋容於嵐翠
柳徑轉而欲迷虹梁涉而思憩則又有綠房含葍冰絲
纏臂輕身延年除煩益氣方采沚而堆雲咸荷貺以錫

類臣思夫盛典之希覲也昔夏如饗釣臺之上炎劉宴

洛陽之宮貞觀慶善之治禮開寶會節之從龍祗以循
殿陛之故事介壽豈以雍容快於田而張樂恩自近而
非公至若幸金明以選勝集芳林而燕喜惟宰貳與宗
姓迺得邀賞賚而沃嘉旨豈有處清譙而軫念股肱合
小大而永膺多祉若斯際之懽洽為曠代之軼軌者乎
臣摛詞未瞻宮錦在膺積愧素飡貺重朱櫻負荷綿隕
醉飫缶盈仰惟我

聖皇之垂拱握璿璣而叶咸英屆有苗之格化宥品物
以含弘佇見九苞集蒼虬迎醴泉涌神芝榮真麟在藪
洛甲效靈慶賜酺與擊壤萃萬國之歡情紀隆遇而靡
罄曾何廻波于為之足稱

賜宴瀛臺賦

有序

毛奇齡

皇帝御極之二十年六幕既熙萬象咸哲內有輯綏之
治外宣揆奮之文講筵陳允執時見羹牆授聞播
懷柔重敷捷伐將奏要荒之耆定進觀華甸之清
寧然猶處治思危萬幾克戢居高善下一德相期
緬茲

九重宵旰之勞翻以百職後先為念

君無忘幾康臣無忘喜起同有賡揚大臣為坎舞小臣

為衍歌共相礪礪因借卷阿之醺酒暫臨曲水以
浮杯鴻醕合樂偕來興慶宮前文喜開筵不在長
春殿裡當此金昊乘秋之際玉衡指兌之時九龍
門外梧樹常陰百子池頭荷花初落蓬臺萬頃淡
波與帳殿俱開閬苑千重紫水共樓船並轉畫橈
齊舉還看水面鳬鷺錦纜同牽原是班中鴈鷺掛
長綃於汾水不待為歌汎碧璣於昆明非關習戰
乃以黼藻華裳之錫展茲吹笙鼓瑟之情龜甲青

羅傳於幌氏麟文繡錦出自

宮中依然束帛之承筐儼發衣裳於在笥纈袍未覆漫
教韋綬裁成霞綺難名第遣封教領去草頭鋪紫
罽竈就瑤漿林下蓋青油判將銀埒夏屋設公家
之鼎秋蘭發王者之香乳中分蠋烹為龍鳳團花
茶內加蘇散作琉璃細眼朱虬堪入脯需賚同昌
縹玉可當醪曾呈裴令爾乃

敕酒正掌頒醪之禮

詔大官習錫膳之儀鵝鶩脾排從錦帶羹前玉鱠金
虀裹在紅綾餅內雖漢南之鵲雀不入腥肴而鹵
海之螭螺久淹菹醢肉泥流翠釜恒誇朔塞明駝
肌雪落霜刀幾化秋林飛蝶况復大梁供米舊號
金鎗太液登鱸新批玉鬣炊彫亨豆擷露稗之通
莖聶鱸加鉶滹河魴於在藻非獨侍餽饗天倉之
粟將使從官饜蓬島之魚爾且醴設六清無煩監
史飲過三爵尚授催籌謂

堯仁之浩蕩一白非狂而

舜澤之澶洄千鍾猶淺縱曰有偕其飲謹聞之大射筵
前其如不醉無歸亦載在朝元詩裏然猶藕船十
丈玉井留甘蓮露三危金盤獻乳簇蜂房於繖下
洗象骨於波間擘圓繭則清漉俱流嚙壺冰而沉
疴頓減種同鴈實頌之覲鴈歸時窠覆馬蹄捧向
馬頭戴出固上林之寶植罕到人間亦惟聖世有
金莖長貽天際在昔鎬京燕飲詩誦嘉賓洛汭觥

鮪史傳盛事遡軒皇之張樂紀績於容成即陶后
之斟膏授籙於錢子是以鄴館著抽詞之美栢梁
誇儷句之能如渢有唱侯服尚興迴波作詞後王
不鄙豈有珪璋韎韐同在遊歌嚴樂淵雲並叨讌
賞而不矢音於高岡稱詩於華薄將使袞裳筐筥
無須採菽為吟陳饋分饍未見其桐作頌南國鮮
鱸魛之可麗北山之杞李以相歡則是式金式玉
在型民無醉飽之心而如阜如山疑天保缺岡陵

之祝亦何以俾匡時之佐負鼎俎而說王功嚮化
之民援土桴而歌帝力是用捃捃荒蕪對揚

優渥借東頭之牘管紀

西園之鴻恩臣奇齡不勝踴躍歡忭稽首頓首而為之

賦

夫以台室冲羸之會天街晃朗之辰六合八荒受治九
州四海稱臣侯甸有同文之俗遐荒無抗德之倫詩歌
江漢之紀誥傳彭濮之賓顓土之媪輿既闢明堂之王

會維新爾乃

君儆無虞臣歌訪落上法天行下導民瘼昕切求衣宵
戒聚擿利在必興疑則廢格喜泰鵠鸞怒剪鯨鰐田董
留畬室務丹雘在宮在府一以振作

聖心乾乾既勤且恪翻謂臣工勞者惟若從來官師規
用木鐸

溫綸諄殷有如砥錯將藉遊豫庶幾酬酢爰設酒醴相
予宴樂時則攝提初指乎金方夷則乍轉乎銅律清露

徐塗乎階除涼風時起乎天末

皇帝御少皞之宮臨蓐收之館將以理白藏調素節司
秋起駕顓正按法時惟秩成道在相月霜柯澄鮮清景
渙發瞻上林之埽塢兮睹太液之滄茫迤三州之藻薄
兮涵萬頃之波光石鯨偃而低棹兮湖雁飛而南翔顧
隰荷之葩翕兮喜臯蘭之正芳婉千葉於華井兮滋九
畹於江湘佳人掩其翠蓋兮君子發乎幽香雜鳧茨而
映蔚兮拔藏莧而獨存於是俯拾虹梁傍依瑤樹彫航

嵯峨紆纚迴互汎潏沅之流波向蓬萊而問度旌銜鳳
艦之乘竿有龍綃之布駕雲母以迎風輯榜人而擊素
拂出水之菰蒲起前汀之鷗鷺林間敞殿齊明雲缺危
樓微露仿祈年之在前盼函德而難泝總蒿宮之既成
猶采椽之故步渚雖轉乎滄浪石無分於灩澦任錦纜
之所牽望瑤臺而不知處爾乃蔥綾雪麗貝錦雲明天
孫剪就鮫人織成八蠶並澣百緝齊縈團花間綴繁纔
相生續或朱而或黑絲一縱而一橫絢布龍鱗之彩織

如鴻翼之輕覆黃羅於玉篋開畫袂於金簾揭尚衣之
紀印胃長籤而署名祿以表乎素貞綺乃發其崢嶸溫
比毳旃之荷榮來華袞之嬰較翠錦而自失何盤雕之
可營若夫掌和受齊大官捧膳輔有鈎芒之羹案設楚
苗之饌割東海之鮮蠡斯南園之斤鷄煎惟芍藥能和
腊以萱蘇為薦按雲鴻於罽羅驚霧豹之芻豢象膏白
以瑩霜猩唇紅而染茜矧鳳液之嘉魚為靈沼所僅見
分腮襍蘆筍之枝切鱠落桃花之片爾乃採江陵之薑

以為齏浙梁山之黍以作飯玉菽星攢金麩霧散擣罌
莖於紫海之泥濯龍餅若春江之練馬醺羊酪覺甘露
之俱生鳳餅龍團雖沃水而無患况夫珠林窈窕布以
璿璣銀塘宛轉青幢是舒太清之酒醺如珍珠瑤漿玉
醴瀼瀼露濡金盤甫繼雜出雕觚比之大斗以燕以娛
監正屢勸仰傳

聖謨謂此旨酒好樂不渝有即醕我無亦可酤不聞晚
近猶有賜酺金門下士幸非淳于張昭雖醉容止自如

起拜稽首不猗不扶含芬咀滑拊躬而思

聖恩浩蕩直如江湖獨憐

小臣

何德當諸廼企淵淪之

深廣兮歎滄波之不測被翠幔與碧衣兮想瑤池之所
植渺秋風之颼颼兮澹曉露之霖霖上有蓮房之戢戢
兮下有藕枝之濯濯外備七星之羅胸兮內含衆竅之
在臆

詔其衆賚此臣庶兮匪止為佐是酒食一片固足消疴
厲兮三漿可以解鄙嗇獨是葑菲之週通兮即污泥亦


不費拂拭宛高節之多梗刺兮亦素絲之能直雖其心
苦之自知兮乃根柢而見牙角第

湛恩之當天報兮兼

知恩之不宿謹捆載而親捧持兮漫縮滋而破蕙念此
痛滴之難嗟嗟兮於眇忽乎何力乃

錫予之有加而靡已兮望滄瀛而未極

皇清文穎卷四十三



總校官庶吉士 臣張能照

校對官檢討 臣王鍾健

謄錄貢生 臣蘇曰柄

欽定四庫全書薈要

集部

皇清文穎卷四十四



詳校官候選知縣臣吳甸華

欽定四庫全書薈要卷一萬九千四百四十五

集部

皇清文頴卷四十四

賦

喜雨賦

陸 藻

爾其清和首夏祝融司令暑氣未溽朱明斯盛招搖南
指龍雩東應羽振博穀頸延戴勝爰告農祥惟茲晨正
土膏既疏耒耜維竟爰需天澤染脂思敬百職靖共協
和神聽維時絳霄下濟盧墳上騰網緼相合霽氣流行

渡狶有影審蟻多情金烏斂翮銀蟾息精膚寸乍起輪
囷旋盈五里非霧羣岩若蒸茫茫原隰晦晦屢覺纖塵
不起歆烟以清俄而光去蘭叢文生蘋末少女神童相
應而發陰鳥翔鳴枝間啁哳棟撒紫雲松梳黃鬣節按
箕師轡馳飛伯啟彼土囊洩其洞穴烏竿欲撼朱旛空
列解慍揮琴歌薰肇悅于焉作解奮豫號令以宣列缺
睽閃豐隆喧闐不霆而怒非火而傳虎鳴旦警蛇掣宵
然除害興利應鐸秉鞭施布陽德滌蕩隱愆非出金門

高下有年蓋自仲春宜發至于是而始振其權也乃召
玄冥乃驅屏翳始而靈霰佐以霏靡綴葉垂璣飄簷曳
縷靈液惟飴神漿且旨濯彼繁條碧鮮如洗潤及浮埃
康莊若砥屋雷欲滴庭注有瀾父老神怡郊圻志喜既
而風激雷奔秋涼晝昏注若建瓴傾若翻盆飛鏃集野
跳珠蔽淵隴畝霑渥畎澮潺湲泛堰瀑沛決渠雪噴稚
苗哺乳饑禾飫殮芄芄嘉穎旆旆芳蓀誰云甘醴而乏
根源于是二十六城之田畯式歌且舞以為我

后之德加惠于三輔元元也維雨初零月之既望族雲
靈霽繩津滉漾冰鏡含眉玉毫濡項終夕空濛詰朝溢
浪市價均平輿情舒暢泊乎三日晴陰交讓泉流變聲
林烟殊狀蝦蟇東拍霞曛西上

天子猶然肅穆于齋宮敬

天庥而受神貺也方茲甘澍應禱滂沱形影不速音響
靡他

綸言斯出穹聽則俄是以商羊失舞石燕依阿鳩未逐

室蟬尚潛波龍角乍奏馳童驟過蓋天人交感未有若
斯之神速者也桐鏗華簏桴擊靈鼉雷火洩石星丸注
坡維麥有秋載卜嘉禾雨金雨粟史臣作歌

大西洋國貢獅子賦

徐嘉炎

聖皇踐祚一十有七載聲教訖於重譯西光曜乎月窟
東震虢乎日域仁風行而外驚誼方聳而遐赫披王會
之昌繁接梯航而絡繹極絕徼之颺舉誇幽荒之轍跡
昔者龍馬負圖出自風皇飛黃伏阜隆於軒帝熊羆當
大禹之辰麟趾振成周之際自漢以降帝籙罕昌間得
珍禽遂號嘉祥般般騶虞白質黑章龍髻宛宛麟彩煌
煌大宛之馬黃支之犀園題赤首修項朱蹄殊形譎詭

倣儻瓌奇變幻恍惚不可端倪雖逸倫而絕覩猶彷彿
乎恒姿乃有猛毅髻髻師子是名既奮迅以躍武亦遊
戲而通神非見聞之能及渺衆慮而靡羣或疑其幻或
詫其靈第稱名於譜牒亦飾象於圖經馴於文康之室
擾於妙光之乘爾其異號狻猊殊名白澤鉤牙鋸爪鐵
首銅額金精之光毛羣之特帝德遠而來賓賢人見而
始出

聖朝重熙累洽洋溢亥步南交輸其珍賁西旅貢其賧

布白狼槃木之鄉黑齒金鄰之部若摧厥角伏弩先路
建格澤之長竿設金貌之廣座于是身熱鼻飲緩耳頭
痛之域四載之所未經二亥之所莫識窮髮之國建德
之都是有國土西洋之區絕域殊方三萬有餘界絕罔
鄰天末是居長老驚相告三年海不波中國有聖人我
土則那爰自疆理及于他境岑峯蔽虧紆餘嶮峻彎崎
之坂臨礪之嶺既谷伏而雲迷亦巖棲而風勁乃命馬
人龍戶精夫舛徒之倫布弋設罟蒙盾負竿袒裼觸蹶

蹠踞盤桓伏鑊鄣而張罝誇雲羅而壯觀扼猛噬于雄
窟圍枳落而突棘藩徒觀其天骨雄詭星眸騰上拉虎
吞貔裂犀分象茸毛斗鉅飛輪電閃剛鏃不磷霜爰不
染喜則尾掉怒則齒齖混蘇合于僧伽疑都梁之近遠
至其體凝露肅威感風稜朝發越裳踰玉門哮吼月
氏翔躍崑崙拔地軸凌天根駭浪急騰虹奔方趨迅而
捷疾將懾息而驚魂孰徒博而陷脰凌重巘而翩翻雖
中黃與育獲且縮朒而難言非

皇威之震疊寧弭帖而遵轅于是麟輅圈鼻纓絡籠筐
彩鷁浮江雲輶蔽岡軼八蠻而入貢超百獸而來王儀
馴觀魏靈囿康莊牝牡伏彩奮神揚虎子僵於北山
龍伯遯乎西荒供玩乎甲乙之帳奠安乎申未之方靈
威慄怒焱旋圻牧狡兔忘其撲朔巨象遺其樺木矧全
力之可撓即餘勇其曷觸迸百斛之漣乳失千里之逸
足寧止筋絕桐絲吼翻林木卧而蠅不敢集其尾踣而
豹不敢食其肉將使天吳遏其神窮竒息其毒銷兩間

之兵氣錫四靈之遐福然而明王慎德義正仁育不貴
異物不寶殊族神靈所至懷柔訥服謫種怪類駭瞿悚
慙桎貳負於疏屬之山紮支祁於胎簪之瀆矧茲標醜
盪胸蠱目廟不可以奉犧牲御不可以供驂服爾乃置
藁街之邸委上林之囿資其膏以療疾圖其形以禦寇
無供役於耳目任優游於林藪與隴山之雪衣亦息幾
而濡味詔舌人與象胥慰遠人之勞疚使者再拜稽首
永誓來享與來王樂

天皇之萬壽

大駕南巡賦

徐嘉炎

粵我

皇清之總三才而襲氣母兮歷

三聖而冠百王惟

聖主之首出乎庶物兮鼓橐籥而播陰陽當甲子青龍
之元會兮赫景命而召禎祥誕五德之純精兮開萬禩
而輝煌耕獵道德而為苑囿兮馳騁仁義以為津梁光
無幽而不燭兮澤無往而不彰紹盤羲而代嬪兮孕苞

符而統混茫既四海之寧壹兮乃兆人之如傷作雷雨
之解而在宥兮象風地之觀而省方爾乃建蜺旌張鳳
旒雲罕日旂虹幢羽蓋萬騎紛紜千乘繁會迺先沛膏
雨於垓埏集羣生於覆載倣天乙之弛羅儀鎬京之大
賚蠲萬國之倉箱望東州而賑貸推恩數於羣臣賓化
育於無外於是背秋涉冬寒氣始升焦溪漸涸湯谷將
凝水澤之腹既堅不周之風斯興木脫葉而童童草解
節而稜稜吾

皇於是駕雲龍之飛輅張秋隼之華旗飾軍容於七萃
申武衛於三驅隆隆記里之鼓譙譙相風之車散轡於
漁陽之野校戎於龍統之墟則有屏翳清塵望舒懸象
飭馳道之離宮闢修途之榛莽有轡轡之攀躋非昉昉
之宏敞眷北顧而逶迤憑南雲而下上值三農之休暇
惟六龍之是望極九有之神功爰告成於岱宗啗齊桓
之望瑞陋漢武之乾封為民儲祉秩敘惇庸望天孫而
至止仰日觀而雍容爰祗誠而徒步乃獨致夫虔恭乘

輿屏而勿御驤褭却而罔從縣崖垂二分之足絕壁俯
萬尋之松似捫參以歷井若凌虛而御風翬天門而馳
閭闔經千樹而瞰三宮胼胝均勤乎大禹焦勞重見乎
神農時則衛士嚴裝從臣啟路釐室傲晨齋宮戒暮慶
成乎荅天之禮敷告乎勤民之故神人允協其休和臣
氓式遵夫矩度鵠車東振闌戟南翔渡沂光而行邁涉
汶泗而飛揚巡河濱而周徧思漱水之溝防玩璿珠於
漆澤屯捷石於宣房招河伯以效靈顧海若而望洋南

際邦溝北始汜光嗟泛濫之愁人致汙萊之卒荒經營
乎潰決之陂疆理乎橫流之塲必鑿海而歸墟斯我田
之既臧何水衡之足惜為當效此一方駕餘艘之乘舟
杭一葦而南游任長風之破浪亦汨波而汨流蕩日青
龍之艦排雲飛燕之樓組練耀昆明之浦帆檣聯彭蠡
之洲牙旗桂檝赤軸銀鉤泳游則羣山遙指溯洄則百
川倒浮盡乾坤於一瞬圻吳楚而為漚緬六代之繁華
經千年之建業瞻虎踞於名都指牛頭為天闕隘紫蓋

之偏安狹金車於季葉瞻故國之山陵乃追揚其謨烈
稽運會之始終崇唐虞之盛節致隆儀於軼代戢軍氓
之翦伐斯無前之至德實靡有之軌轍惟經綸天下之
大經迺曠世同符而莫越南眺吳會清嘉之宇俗號秀
民地非沃土念轉運之京坻恤煩疲之廩庾襟茂苑於
具區帶海濱於江浦仰泰伯於千秋起言游於三古稽
山在望胥濤驚眼勤望幸於黟江佇光榮而宛轉睞
兩宮之暫離遂六飛之旋返植梧鳳於岡陵斲修蛇於

墳衍馳延屬之紆道陟崩施之峻坂灑

宸章於妙高登浮玉而遐覽黃童襁負以待澤黎庶謳
吟而送遠觀乎人文久道化成感終古之教澤巡闕里
而式憑大猷是經先民是程崇帝師而下拜志尊道以
弘文晰欖檀雒離之木辨雞彝龍勺之銘翠古檜之菁
葱撫楷模之輪囷湯湯乎洙泗之流屹屹乎防阜之城
結山河之兩戒鍾地脈於百靈於是世胄謁禮諸生肅
興倣累朝之賓監崇元聖之雲仍制既隆於紹嘉恩更

宣乎褒成盛三雍之上儀崇百代之休稱是日也

天子考五經之統紀思六藝之折衷爰披圖而誌績論
報德而酌庸籩豆舞佾之繁銀鏤琰琬之隆是未足以
光天德贊聖功乃留曲蓋之凝嚴軼葩瑤之寵從詔祇
寅乎禋祀紛肸鬩而豐融廣錫類之孝思弘論說之儒
風歷漢元以迄今茲誰尊聖之克同爰乃迴駕旋軫飛
軫整旆鳳蓋玲瓏麟毫琴麗張廣樂於洞庭舞咸池於
北冀千鈞之簾力洪萬石之鐘音備賦忠厚於行葦歌

太平於既醉千疆雷赴萬里星奔東熿滄海西耀玉門
奠斗辰於中極布星宿於崑崙日南則威加窮髮漠北
則武震烏孫重舌緩耳之國雕題黑齒之氓莫不來王
而慕義稽首而稱臣

皇帝猶祝時雍之速屆俾風動之遄臻迺下

明詔勵羣臣崇學校飭儒紳道德文章濟濟振振遐陋
密壤過化存神是以敷天之下率土之濱含文抱質履
素懷真歌風舞雅蹈義詠仁沐浴乎詩書之澤翱翔乎

禮樂之英郊畿父老迺望

屬車千官紛會雁列鳬趨懷銀黃及璽紱佩玉虎與金
魚頌省耕省斂之舉上豐年大有之書猗歟盛哉皇帝
王三嬪之運唐虞夏遞降之餘惟我

皇之至德歷萬古而難踰頌曰煌煌

聖祖創維艱兮洎我

章皇開八埏兮

皇帝聖德弘先業兮既覲文光揚武烈兮三葉既殄毒

痛除兮海不揚波同車書兮殊方貢琛入質子兮震疊
懷柔百神慰兮思我蒸民際太平兮或虞幽隱壅上聞
兮省方陳風觀我生兮登岱祈天志憂勤兮經綸參贊
導先聖兮道一風同克永命兮有虞五載巡狩徧兮亦
越姬周十二年兮我

皇法古純不已兮時邁其邦昊天子兮小臣獻頌介景
福兮

聖子神孫永天祿兮

懋勤殿賦

湯斌

黃扉日麗寶笈雲開帝座之光華正燦東壁之淑氣迎
來道衍圖書法象觀乎天地學深墳典奮迅擬乎風雷
我

皇上岐嶷敏睿麗正凝神本精一以立皇極建中和而
定羣倫納諫不遺對非招賢旁及隱淪武庫森嚴撻伐
悉遵

廟算九功歌敘民隱日達楓宸固已樹儀型於百辟貞

仁壽於千春若夫煥太乙之喬皇曜勾陳之暉麗黃雲
紫蓋輪囷鬱其上浮蘭朶金莖灝渺翔於天際珠宮貝
闕複道斜通銀榜璇題交衢迢遞飛重簷以切霞炯丹
壁而流飄龍舸泛萬頃澄瀾長楊帶千章翳鬱斯又足
奠六鰲而輦四極應三垣而馭五緯爾乃廣闢別殿宏
貯縹緗鴻濛矗而竦峙觚稜啟而景彰揭組幔於焚楮
垂綺錦於虹梁甲帳之月光如雪秘幄之芸火生香瑤
函左列竹素盈牀五庫標目於西清四類充帙於東廂

犀籤重積玉軸焜煌未足矜宛委之寶冊何須論天祿
之蘊藏當夫金門朝罷宣政宴餘鸞珮聲遠鳳扇影徐
名儒招從白虎大雅延自石渠究道系於洙泗證心法
於唐虞無黨無偏闡維皇之敷錫天秩天敘繹臯陶之
訏謨既朝乾而夕惕復無倦而有恒顧民畧之可畏識
當位之利貞尊所聞而行所知高明廣大有治人斯有
治法深切著明斯乃懋勤之實政匪僅肇錫以嘉名矧
夫歌叶雅頌文儷誥盤懸針倒薤戲鴻騰鸞雲氣芝英

之簡淵停岳峙之觀漢武望而廢牘章帝顧而輟翰以
此乘泰運而御六龍映晨光而翔五鳳采太史之陳詩
第羣臣之嘉頌而時幾勅命祁暑思艱心游農野道契
先天夜如何其夜未闌瑤編萬卷寶炬殘流月瞳瞳兮
素華滿北斗低昂兮殿閣寒豈比夫甘泉暉章長樂未
央凌霄飛雨蒞若披香九華仁壽百福靈光列芬橈以
布翼荷棟桴而高驤雕玉璵以居楹裁金碧以飾璫祇
矜制度之煒煜何敢希道德之輝光況乎文教敷宣天

威遐被都護方開劍閣雲將軍已定三湘地碧鷄金馬
之修祀無勞蒟醬橦華之輸將遂易百禮具興萬舞咸
備

皇情悅愉羣臣既醉降綢繡調元氣阜財解愠薄賦寬
徭踰於穆之緝熙耳擊壤之歌謠天下棄偽而返本敦
朴而去澆追太始之元化偕華胥而逍遙謹摛辭而頌
聖主

微臣

敢自託於王褒

欽定四庫全書

卷四十四

西山賦

丘象隨

伊坤元之廣厚兮氣含陽而凝山既磅礴以四塞兮宵
嶙峋而上干矗名山兮三百紛支山兮三千雄九州而
稱鎮兮峻五嶽以崇班仙靈托其窟宅兮封禪縱以遊
觀乃西山之綿亘兮拱皇都而高盤落太行之迤邐兮
貫遼海以瀰漫諒靈秀之所會兮亦安窮其際蟠岡載
起而載伏峰若散而若連萃土脈以鬱蒸滙西湖而飛
瀾既激灩而澄徹亦決潏以潺湲蕩甕山於涯涘穿蒙

密而盤桓翳清塵而磴削倚圓靜於崇巒左田右湖人
烟相搏菱芡皆糧灌溉多歡誠山農之野樂宕予興以
彌寬緬賜金之遺蹟躡功德之巍然洪波衍其東幽林
出其前紛古木之茂幹圍四十而始圓盡叢薄而空豁
到聲光於玉泉渺若素練鳴絕壑宛若晴虹飲碧川迸
若明珠瀉合浦皎若星漢垂蒼天通華巖以深窈探三
洞而稽延黥一竅之陰黑傳勝跡於名仙終曲折而却
步疑神蛟之幽潛徐平林其我邁兮迴瞻藹而寂歷騰

樹樹以明輝兮染山山而黛色顧香臺之在望兮破白
雲而高入疊峻嶺以數匝叢修木而萬積開九軌之徑
涂兮聳觀閣於三霄飛丹青於太虛兮越鐘磬於林石
盼風樹之從容兮興流泉而共得俯橫橋而徙倚兮魚
鱗鱗以迎客殿五重而穹窿兮盤烟嵐於磴級幻樓臺
之高下兮隨山勢以疎密收全勝於四覽兮憑來青而
咸集允翠色之獨佳兮徹西矚而莫極迴無量於遐瞻
兮亦夢泉之猶識松護駕以謾謾兮幹虬舞而如鐵臺

祭星而巍巍兮適軒豁以朗潔爐裊裊其餘香兮永氤
氲而不歇撫丁丁於棋盤兮想偃佺以對奕生蟾蜍而
偃仰兮方怡神於靈蹟乃沿山極望而紛紅兮則杏花
之霞赤轉峭削攀蘿藤上截薛入宵冥列槐蔽翳危徑
峻嶒碧雲在上金銀結成丹雘碧璫盪搖光精虹蜺駕
棟蛟螭蟠楹四闔八牖廡接廊迎羅雲宿霧玉闕化城
琢壁鏤橋營窟精靈泉流香積聲散林垆賜碑蘚剝卓
錫泠泠爰洪光以載探兮極松盤之陰凝枝橫偃而交

拱兮葉屏障而中行逼香光與聲觸兮悉古栢而遮盈
乃玉華之彌高兮折十八盤而仰登瞻石塔以岿巍兮
卧法王於無聲來寶樹於西域兮揚娑羅以飄零卓三
圍而九花兮妙七葉而三棱復溪盤而石倚兮茂琅玕
之菁菁筍盈文而猶籜兮逼孫枝於太清鼓蒼筤而縣
邈兮接隆教之淵泓恍野燒以凝睇兮垂丹柿如繁星
尋水源之盡頭兮遙感沸其來聽下清響於蒼嵐兮激
細泉於亂砵踰廣泉而曠絕兮摩五華以雲平送悠邈

於翠巖兮陟中峰之崢嶸一階砌以白石兮恣坐卧乎
晶熒已選勝於晏祠兮創獨見以經營崇上聖而尊大
儒兮鑿石龕以藏經豈魯壁之遺矩兮亦木鐸乎二氏
之縱橫翳名山而獨占兮崖秘魔以高憑解旱魃之倒
懸兮沛靈雨於雙青何龍湫之莫測兮神道力於盧僧
蹈石屑而西步兮壓烟巒以萬層豁平坡於山坳兮留
雙屐而暫停耀夜光於寶洞兮復照岩而珠明住濟勝
以徜徉兮更窮探乎溇溟爾乃戒壇邃肅極樂縹緲近

翠遠黛八洞繚繞龜伏魚游龍馴貌擾固頑石之幻趣
亦靈境之獨表曾海眼之不潭尤枯拓而長矯矚石景
之天然粲金閣而構巧綴蒼黃以南帶聿渾河之灝淼
波雷殷而雲涌岸危迅而如掃橫蜿蜒於板梁俯中流
以渺渺斯誠塵世之勝賞而都城之雅抱也曠不海濶
近亦市絕異禽紛翔怪獸錯列草氣皆香樹名莫別霧
雨晴零霜風夏冽逕斷雲封寺迷烟截鳥一時而百鳴
花經歲而不輟任車馬之喧闐幾因人而肯熱得天地

之金精故飛爽而高徹乃京華之勝景首茲山之霽雪
夫豈蘊春夏之氣而宜收藏之節者乎我尤愛其駐夕
陽之在山而以迎皎皎之初月

南苑大閱賦

施閏章

天祚

聖德地盡皇輿爰膺玉厯坐撫神區維赫濯於新命踵
幽燕之舊都岱宗位其東藩太行峙其西隅枕居庸而
帶滄海象天闕之辰樞亶建極於垂拱豈耽逸於康娛
然而遊豫徵於夏諺畋漁肇於羲易姬文有靈臺之詩
漢武侈甘泉之制蓋將以觀雲物節勞逸振師旅講武
事藉田禽之多獲簡軍實以有備乃有西苑瀛臺近取

禁內樹列千章山稱萬歲俯玉泉之清泠挹西山之紫
翠眷別苑於南海伊密邇於王畿壤連天以曠莽水浴
日以漣漪插崇墉於雲漢清輦道於郊圻睇紅門之截
業想帳殿之參差其陸則途通九達軫連三輔金臺扶
轂督亢接武碣石遠而來朝翠微近而獻嫵眺平楚之
蒼然樂原田之膴膴其水則滴沸沆瀣澹沲淵泓桑乾
輸派溟渤效靈島湮渚溢風靜波鳴囊括太液餅揭昆
明閃旌旗於河伯動鱗甲於石鯨邈乎若乘槎之浮銀

漢彼哉哂求仙之汎蓬瀛於是菰蒲沉綠菡萏敷紅鵝
鵲翡翠仙鵲賓鴻呼羣鼓翼唼雨鳴風屬玉翔而上下
赤鯉戲而西東雉兔麇麇遊集乎其外虎犀熊兕騰躍
於檻中玉樹蓊鬱佳果連卷張公梨茂朱仲李蕃葡萄
盧橘珠綴火然上林閒居之賦爾雅方物之編窮侈極
異不可殫言時登高而騁目樂四野之芊眠是時百穀
告成八荒賓服西旅貢以厥獒于闐獻其浮玉龍馬來
於大宛象師致於西域

天子治不忘亂安不忘危乃詔虞人營虎落乘戎輅載
白旗千騎電發萬乘風馳用三驅以祝網命八校以前
驅竟陵谷以張罽界河海以為陸飲飛賁育騁其拳勇
韓盧雕鷂恣其指揮俄推山而抨石捲四野而合圍氣
吞麋鹿手搯熊羆皆應弦而命中若俯身而拾遺風毛
雨血括雄併雌由是割鮮殷輪委禽蔽地程校多寡殿
最次第勇怯分明惕威銜惠鳴銑振旅歸而飲至
天子乃推絳灌之宿將詢旦奭之訏謀尚想頗牧之賢

旁覽孫吳之書敷文德於荒服定勝筭於當樞姬有荆
舒之懲商有鬼方之誅畫策則燭照而數計殲寇則拉
朽而摧枯令嚴則過王師於衽席功成則告

列祖以獻俘然後班張枚馬驚聽駭睹或奏賦於長楊或
歌恩於湛露頌擬白狼歌傳朱鷺鏤德銘功垂諸竹素

天子乃所無逸戒禽荒佩虞書九德之盛詠豳風七月
之章眎異姓若赤子以八荒為蕭牆猗允文而允武亦
知柔而知剛將麟遊而鳳至永萬壽其無疆

牡丹賦

施閏章

瀛臺之西太液之涘天作一丘鸞停龍起玉泉遶流燕
山側峙

宸遊禁苑實據其趾山呼萬歲園稱百草珍禽翼接異
卉花妥潘岳閒居不能列其名相如上林未遑載其顙
羅羣芳於四時推國花之獨冠既叢植于芝房復駢延
於蘭館信奇葩之可懷萃根株之無算若夫梅英纔落
柳絮將飛東風游暖疊葢初開盈盈灼灼鬱鬱皚皚千

枝萬朶拂檻翻堦雲殷別苑霞綃高臺白擬玉版赤類
丹砂既真珠之九蓋亦千葉之蓮華壽安潛溪以地異
添色倒暈以種誇品盡洛陽之美數過廬陵之譜勝玉
樹之菁蔥豈人間之所睹

天子乃佩蒼玉幸離宮移步輦就芳叢翠華旖旎周覽
肅雍或紺蕊扶疎獨號朝天之紫或露苞灼爍名擅御
袍之紅或臨風昂首晨露未稀若向榮而吐氣聳翔步
於金閨或回飈側景朝雨方滋若承恩而既醉還霑灑

於朝衣列樹爭妍若六宮之奉顏色異彩繽紛又若冠裳之來萬國爾其修廊回幔日暖烟含青陽斜映綠暗紅酣於斯時也

天顏一笑萬卉咸歡香吹合殿色射青山杜鵑屈膝桃李無言錦雞失艷南威喪妍時則授簡侍從淵雲之彥賞花賦詩飛英濡翰亦有重臣出使遠人朝見引入禁林恩霑芳宴剪插玉壺則婆娑几硯折賜宮僚則寵光繾綣雖松有大夫之號蘭為王者之香拒霜有美人之

面秋菊為隱者之糧芙蓉蕖澤處而綽約將離質弱而徬
徨莫不低眉却步遜謝頡頏臣拜手稽首為之歌曰處
艷兮不治含芳兮不誇不與時競兮大肆其華豈遺世
兮獨立欲並美兮不可得舒大文於東皇兮攬春暉兮
何極

平蜀賦

有序

潘表

皇帝御宇十有八年冬

命奮威將軍

臣

進寶勇畧將軍

臣

良棟同建威將軍

臣

吳丹率師討蜀寇密授方畧分道進攻十九年正月癸丑進寶同吳丹克保寧偽將軍王屏藩窮蹙自盡擒吳之茂以下二十餘人前三日庚子良棟自龍安進克成都偽巡撫張文德降蜀地大定丁巳露布至京宣捷午門外在廷之臣咸以

皇上廟算恢闕坐見萬里激勵將士建茲奇勲相與踴

躍唱嘆形之聲詩

臣遭遇

殊恩載筆史館頌揚成功職不敢闕謹獻賦曰

溯前王之烈偉捷伐之謨奸無鉅而弗剪兇無遠而弗
鋤霆發聲於豐隆星耀芒於威弧鯨吞舟而就斲蛇搏
象而見屠法春生與秋殺有霜落而露濡必武功之遐
暢乃文教之誕敷惟我

皇之聖仁廓天地以為量王道履以平平天門開其蕩

蕩彼公膺之小醜敢作逆而衡抗類射天以彎弓似逐

日而投杖蛙處井以陸梁螳當車而倔强依嵐箐以為

巢憑崖谷以作障巖巖梁益實號金城地闢蠶叢山開

五丁劍閣梯空以懸度棧道循絙而上征天井盤迴而

窈黑地網綿絡以縱橫水以虎牙赤甲為咽喉陸以龍

門鹿頭為門戶挺一戈以當關非萬騎之能取當天光

之分耀有草竊以偷處曾六合之一家敢守險以拒旅

雄虺九首苞蘄三牙傳烽巴閬築壘褒斜驚百城於風

鶴變一軍為蟲沙初屯蜂而聚蟻旋鬪鼠而戰蝸思明
殪於河陽少誠殲於淮表彼逆孽之遊魂若枯莖之待
掃何醜類之睢盱尚橫距而張爪倚嶂嶺之千重謂天
險其可保

皇赫斯怒整我六師招搖為戈參伐為旗審制勝之在
將料奪險之用竒拔虎臣於行間建高牙而授之曰汝
進寶貌貅如雲東趨閭中毀其重門曰汝良棟突騎風
雨西走陰平挾其後戶分道交攻竒正相權或掎或角

動於九天惟東軍之驍騰凌七盤而徑度奪朝天之巖
險葭萌空而不成分勁旅為三行令異道而同赴摧堅
陣於背城殲突獠而餘怒積甲齊乎錦屏投鞭斷乎江
路迨禁旅之薄城斬門關而齊驚兇渠斃於窮猿逆黨
擒於脫兔蓋纍纍籍籍鈴甲面縛者不知其數西師卷
旆以橫邁据密樹之重關出間道以擣虛儼羶裹而林
攀爭白水之隄塞破鐵門之孱顏忽浮馬而渡江張赤
幟於菁山朝耀兵乎江油夕嚴陣乎綿竹訝天兵之飛

來俄攻心而潰腹開錦地之戕戕豎降幡之一幅收奇
功乎浹辰若風雷之迅速捷書並奏飛檄交馳鋒不再
淬矢不再披剗勁寇如振槁舉名都若拾遺

天子乃升紫宸之殿讀露布於彤墀千官萃乎闕下望
天顏之怡怡莫不鼓舞讚頌曰盛哉乎武功振古未覩
茲也惟此劍南代有反側塹山燒棧便同絕域若漢室
之取公孫晉氏之斬李特宋主之擒譙縱唐宗之誅劉
闢皆用堅攻瑕以順討逆風行電掃罪人斯得然皆水

陸夾攻首尾並擊傷損將士窮竭兵力踰歲淹時僅而後克未有不頓一兵不折一戟駭若發機震若霹靂旬月之間廓清西極如今日者也

天子將將大將將兵既得龍驤復有營平師以和而後克功惟斷而乃成規萬里若指掌故無戰而有征夫蜀國者滇黔之項領也蜀平則破竹無前建瓴直走蒙詔亾魂貴筑不守將遂定邛棘畧犍為無冉駹收沈黎簡巴渝之勁卒與彭濮之銳師浮舟牂牁飲馬瀘溪峨嵋

為鐔點蒼作鏐，且果葉榆圍掩蒙，樂伐銅鼓之砰訇，驅金馬之騰趯，血鑿齒以釁鋒，膏猓猱以染鑊，然後前歌後舞，班師而還，受成。

廟社薦功

皇天包干戈以虎皮，却走馬以糞田，沛曠蕩之恩，下復除之，詔與萬姓相勞苦，哀疲氓之無告，拊摩癰瘡，長養凋耗，勸耕課桑，興廉舉孝，蒸斯人於太和，咸詠仁而蹈道，基隆平於萬年，襲三五之休號，豈不盛哉！遂作頌曰：

天錫智勇為

君王兮神武不殺誅猖狂兮運籌決策自

廟堂兮任屬賢將齊鷹揚兮天戈一麾銷櫓槍兮遂清
大憝克鬼方兮長御遠駕包八荒兮刊山表柱垂無疆
兮

東巡賦有序

勵杜訥

臣粵考載籍省方之文著於易巡狩之典備於書時邁哀對之頌疊見於篇什則是古之帝王未有不巡行方國以察遠邇之風俗恤億兆之痼瘼俾得各遂其生成以登一世於郅隆者也自漢唐而後歷代之人主莫不高拱黃屋以養尊處優時巡之義久廢而不講即或玉輿遠駕亦必清蹕戒塗其時之黎庶雖欲就日瞻雲希至尊之清問豈可

得哉所以望九閭如萬里而閭閻之疾苦壅於上
聞朝廷之德意不能下究由來舊矣我

皇上聖仁如天智勇如神深黜近世之積習遠法隆古
之宏規巡幸郊畿省耕省斂既已湛恩汪濊周洽
靡遺猶以四方之幽遐山陬海澨或有一夫不獲
之慮迺

命駕東巡由瀛州過歷下濟河渡江詣建業而
駐蹕焉凡

六飛所至無論通都鄙壤必諮詢民生之利弊俗尚之淳澆吏治之臧否草野愚賤皆得仰覲

龍顏親承

天語以各攄其所欲言額手嵩呼歡聲徹數千里即華封之祝聖人曷可以方此至於擢廉能拯水患蠲租稅格神祇祀曲阜之林廟禮鍾山之陵寢善政纍纍恩施稠渥

奎章宸藻寵錫名區皆唐虞三代以來所僅見之盛事

洵足焜耀天壤而昭垂典冊臣濫竽史職不敢以
荒陋自匿謹竭駑鈍拜手稽首以獻賦曰

維

聖皇之御寓握乾符而闡坤珍倖羲軒之化理冠道德
而履純仁聲教誕敷於溥海品物共樂乎鴻鈞尚厯如
傷於蔀屋不自暇逸於

楓宸郊圻時幸補助維頻念疆域之浩浩戶口之溱溱
或有懷而欲訴忤鬱而難申爰筮吉日渙明綸先恩覃

乎九有以往省東土之民於是星旄聿建霓旌前指鳳
蓋霞張鸞旗雲起

天子乘渥洼之蒼螭天閑之素虬而弗御乎金根之輶
玉輅之軌將攬轡以周諮接編氓於尺咫除警蹕之禁
嚴播瑤音於遐邇過唐叔之故封經舜泉之遺址時徘徊
乎道周采風謠於都鄙時維十月候逾肅霜既萬寶
之告成咸築圃而滌場婦子熙恬於百室亞旅釋耒以
徜徉聞

翠華之臨幸莫不踴躍於康莊若夫詩書絃誦四民之
良久沐浴乎膏澤而喜近日月之光爾乃子衿縫掖依
帳殿以譚經白叟黃童傍

龍驂而論俗得聆

天問之肫肫仰見

聖容之穆穆或拜神鼎之瓊珍或沾蓬池之玉藪抑且
供億之不聞戴恩波於信宿蠲豐稔之田租倍家給而
人足泱泱乎大國之風當盛世之漸摩而益歸於淳樸

載華旂而發駕由渤海以漸東歷岡陵之蜿蜒瞻千仞
之芙蓉巖巖泰岳靈氣所鍾東方為萬物之始故名之
曰岱茲山為五岳之伯乃稱之以宗逼層霄而律率紆
盤磴以龍從必藉籃輿而仰陟或竟一日以扶筇我
皇為蒼生而祈福齋心肅肅而雍雍步輦既卻晷景三
移而已躋乎四十里之危峰登天門而臨日觀躡神府
以訪竒蹤白雲在下碧落儼通衛士竭蹶

玉趾從容斯神靈所呵護而曠古之所未逢乃攜天藻

揮宸翰鎮石表燭蒼穹既鄙探策求仙之故事更陋金
泥玉簡之登封迥出乎七十二代之上獨標萬古之高
風遂延覽於青沂時咨諏而噢咻憫樸邀之山農期人
登乎四輔惟洪流之在望乃往觀乎河許原夫亘地而
經天用遡神功於大禹雖九折而洋洋每湧溢於中土
酸棗瓠子多勞費以修防賈讓延年究空談於往古
敕戒金隄歲煩藏府猶慮夫濱居赤子或未免乎畚鍤
之勞運輓之苦傳

雲罕以流恩俾窮簷之有補若夫狐貉之祭璧馬之沈
皆無關於實政而非

聖人之所取遂涉淮浦溯汜溝弗忍田廬之昏墊爰發
疏濬之遠猶維吳下之勞於貢賦縈

宸衷而恤其隱幽一如東山之黔首競忭躍於花洲建
康名郡民物雜稠六朝都會之地有明創業之陳稔習
乘輿之難近法駕之尊優獲睹

天顏以抒情愔已誇異邁而動歌謳況乎深仁之洽被

愷惠之翔流至於

幸鍾山之林麓軫勝國之陵丘飭明禋而

頒嘉制戒典守以護松楸尤高深之至德卓越乎千秋
洎旋軫於秣陵望魯郊而至止宅心道秘久釋奠於西
雍悅志儒修更致虔於闕里肅太常以備樂集聖裔而
習禮升觴折俎列奉璋之戔戔鬯灌登歌識睟容之亶
亶設車服以詳觀出琅函而盡啟日臨洙泗以垂輪雲
繞杏壇而皆紫凡列廡之名賢胥潔蠲以分祀

御墨輝煌於廟庭錫賚繽紛於筐篚章縫在列以增榮
野老環橋而色喜斯行也

仁恩洪暢綱紀畢張勤同虞帝德媲陶唐仰

聖暉者侈斯生之厚幸僕我

后者咸延頸以相望固合寰海而風動豈惟被澤之一
方當茲珠斗北臨實沍寒之節序乃

玉鸞載路敷暄景若春陽是誠天休滋至瑞應丕彰將
錫聖子神孫以無疆之福開億萬斯年有道之長宜乎

賡卿雲爛縵之頌光華復旦之章

瀚海石子賦

以石韞玉以
山輝為韻

勵杜訥

寶待時而用彰

聖遇物而必格兼收徧及於山林博採勿遺於川澤聿
維瀚海爰生珍石托體龍荒呈姿沙磧吸日月之光華
映星辰之精魄苟鑒拔其莫由幾沉淪之足惜懿彼美
質天成晶英內韞雲霞璀璨象萬物以賦形錦繡陸離
配五行而合脗其為色也既滋綠以焜黃復塗硃而施
粉其為體也掬之盈把壁連城而可方其為光也玩之

奪目珠徑寸而相近用無不遺或飾佩以鳴璫功有足
多能蠲疴而解愠爾其際遇

聖明有長必錄僻壤遺村每邀

天矚網珊瑚於東海遴杞梓於南服然而所寶惟賢不
尚珠玉卻輦賁與航琛祗課畊而貴粟胡斯石之蒙
恩邁竒珍於結綠維時

天子總六師操弧矢靖朔漠勤玉趾小醜立殄

天顏有喜奏饒歌以凱旋顧斯石而嘉美於是屬車爭

攫似編貝以盈裾錦橐交盛復流霞而散綺遠觀之則
繽紛錯落而難名把玩焉則盡態極妍而莫擬星斗風
雲花木山水鳥獸蟲魚蜃樓海市無不畢肖其微茫豈
徒畧得夫疑似非意想所可到斯繪畫之絕技用是依
文藻協芳芷侔芸窻供斐几充雅玩於文房非斯石其
何以若乃光騰筆彩氣吐硯山吸朝露之清潤含秘閣
之幽閒竒文鬱鬱秀色斑斑勢如高峯之壁立影涵曲
澗之潺湲是皆

聖武在御遠播

天威智勇赫濯雷電馳飛瑞應畢至萬寶齊輝想蘊靈
於大鈞故爾中堅外潤迨見用於


世不殊方璧圓璣企

聖化之及遠仰

淵衷之察微獻蕪詞於文石之陞彌覺大哉

堯德之巍巍

皇清文頴卷四十四



總校官庶吉士 臣 張能照

校對官檢討 臣 王鍾健

謄錄監生 臣 蔣予林